



JUDICIAL SYSTEM MONITORING PROGRAMME

PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Periodu Juñu 2011

Parlamentu Nasionál Altera Estatutu Ministériu Públiku

Iha loron Segunda, 13 Juñu 2011, Parlamentu Nasionál, aprova ona alterasaun ba Prímeira Alterasaun ba Lei Estatutu Ministériu Públiku ne'ebé pasa ho votus afavor: 25 (husi CNRT, PSD, ASDT), kontra 3 (husi Fretilin) no absteinsaun 8 (Fretilin, Kota/PPT no PUN).

Diretór Ezekutivu JSMP, Luis de Oliveira Sampaio haktuir katak *prosesu aprovasaun ne'e nu'udar pasu pozitivu ida iha setór judisiariu atu responde ba preukupasaun públiku konabá pozisaun Prokurador Jerál da Republika ne'ebé dalabarak sai polemika ka kontraversiu tanbá sira nia kariera antisidente (latarbelakang karir) nu'udar ema politiku.*

“Hau hanoin katak prosesu ne'e nu'udar resposta politiku ba realidade aktual ohin loron nian konabá intervensaun Ministériu Públiku nian ne'ebé dala-barak preokupa entidades oi-oin tanbá deit instituisaun ne'e nia superior ne'ebé mai husi ema politiku. Ita hein katak ho alterasaun ne'e bele fó kbi'it diak liu ba Ministériu Públiku no liu-liu atu evita persepsaun no tendensia sira ne'ebé durante ne'e eziste”.

Proposta alterasaun ne'e rasik apresenta husi Ministériu Justisa iha loron 12 Feveireiru 2011, ne'ebé husu altera lei aktual (14/2005) hahu husi artigu 3^o,4^o,5^o,11^o, 13^o, 14^o, 17^o, 18^o,20^o,21^o,25^o,26^o,41^o,53^o, 56^o,80^o,83^o no 84^o.

Maibé iha prosesu diskusaun, deputada Carmelita Moniz ho Deputadu Arão Noe husi Bankada CNRT apresenta mós proposta alterasaun ida ba artigu 12^o konabá Nomeasaun no Exonerasaun (*pengangkatan no pemberhentian*) ba Prokurador- Jerál da Repúblika iha alinea 1) konabá nomeasaun.

Tuir Artigu 12^o Estatutu Ministeriu Públiku Aktual Nú. (14/2005) husi alinea 1 defini katak :
O Procurador - Gerál da República é nomeado e exonerado pelo Presidente da República, ouvido o Governo, de entre magistrados o Ministério Público, Juizes de carreira ou Juristas de reconhesido Mérito (Prokurador-Jerál da República nomea no hapara husi Prezidente da República, rona husi Governu, entre Majistradus iha Ministériu Públiku, Juizes de kareira ka juristas rekoñesidu husi méritu).

Tuir mai Proposta Alterasaun husi Deputada Carmelita no Arão Noe, ba alinea 1) maka : “O Procurador-Gerál da República é nomeado e exonerado pelo Presidente da República, ouvido o Governo, de entre magistrados do Ministério Público, e de Juízes de direito de categoria não inferior 1ª classe” (Prokurador-Jerál da República nomea no hapara husi Prezidente da República, rona husi governu, entre Majistradus iha Ministériu Públiku, no Juizes Direitu ho kategoria la mai husi 1^oklasse nia okos).

Proponentes nain rua ba proposta ne'e mai ho argumentu katak, kriteria ba nomeasaun ne'e tenke altera duni tanbá atu evita deskonfiansa no politizasaun iha kualker desizaun Ministériu Públiku nian. Tanbá tuir sira, esperensia husi figura Eis PJR Longuinhos Monteiro no Aktual PJR Ana Pessoa (nomeasaun tuir méritu), ne'ebé dala barak sira nia desizaun atu los ka sala, maibé públiku sempre kestiona tanbá harê ba sira nia *background*.

Aliende ne'e, razaun seluk ne'ebé sira apresenta katak ho alterasaun ne'e hanesaun oportunidade atu promove Majistradu Timór oan sira ba pozisaun PJR, hodi valoriza dedikasaun ne'ebé sira halo ona iha sira nia profisaun de kareira.

Durante plenaria, POP observa katak, artigu 83 husi proposta alterasaun ne'e mak hamosu diferensias ideias entre deputadu sira iha Parlamentu Nasional. Artigu ne'e, propoin no loke dalan ba majistradu sira husi rai sivilista sira atu okupa pozisaun Prokurador Jerál da República kuandu majistradus Timór-oan sira seidauk bele priense kriteria 1^oklasse tuir lei ne'e rekere. Deputadu Bankada CNRT, rekoñese katak, oras ne'e majistratura Timór oan husi Juizes no Prokuradores nein ida mak priense ba 1^oklasse, tanbá ne'e hanoin katak provizoriamente bele implementa artigu 83^o ne'ebé fó dalan atu uza Profesionais de kareira husi internasionál hodi hein Timór oan sira to'o iha faze 1^oklase.

Maibé husi Bankada Fretilin ho PUN inklui PD la konkorda ho esbosu alterasaun ne'e ho razaun konsidera lei ne'e la'ós promove Timór oan maibe promove fali ema estranjeiru sira. Basa'a, ho lei ne'e, Timór oan hirak ne'ebé iha dedikasaun antes no atual iha setór privadu, inklui iha méritu ne'ebé sufisiente ba sistema judisiária, labele ona hetan oportunidade atu kompete ba kargu PJR, tanbá la inklui iha formasaun de kareira.

Pior liu, konsidera lei ne'e sai kontrariu bo'ot tanbá iha alinea 1) la fó tiha ona oportunidade ba Timór oan, maibé prefere fali atu fó fatin ba ema estranjeiru sira. Ida ne'e tuir sira la'ós tama iha vizaun atu promove Timór oan.

Entre Fretilin, PUN ho PD konkorda liu atu mantein lei anterior no atu evita politizasaun tuir loloos muda mak artigu 36^o konabá aktividade polítiku-partidarias ho artigu 83^o konabá possibilidade fó fatin ba ema estranjeiru ba kargu PJR husi lei estatutu Ministériu Públiku. Tuir sira katak Importante liu halo lei ne'e tuir kondisaun real TimórLéste liu-liu ba ita nia kapasidade rekursu umanus. Purtantu se karik majistratura Timór oan seidauk bele priense kriteria, bele fó oportunidade ba figura sira seluk intermus méritu duke fó ba ema estranjeiru.

Ikus, Fretilin mós la konkorda, tanbá hare katak, alterasaun ne'e hanesan interverensia ba Komptensia Prezidente da República tuir konstituisaun RDTL alinea k) husi artigu 86^o no alinea

3) husi artigu 133⁰ konabá komptensia Prezidente da Repúblika atu nomea ema ruma ba PJR tuir nia konsensia ba durasaun tinan hat (4).

Mesmu iha diferensia pozisaun, maibe ikus mai proposta alterasaun ba alinea ne'e pasa duni maske ho votus ki'ik tanbá PD vota abstain. Rezultadu votasaun ba artigu ne'e pasa ho votus afavor 18, kontra 12 (Fretilin+PUN) noabsteinsaun 7 (PD).

Atu hetan informasaun kle'an favor kontaktu direktamente:

Luis de Oliveira Sampaio

Direitór Ezekutivu JSMP

Diresaun e-mail: luis@jsmp.minihub.org

Landline: 3323883